

EFESIOS

Pablo queétdih ã táyat tútata

¹ Weém, Pablo, biíhdih daacát tútata, yeéb Éfeso tútchidih moón Jesúíhwādh wã wahna caá. Dios ã náahat pah Jesucristo weemdih ãih táini doonádh ã naáwát tútata caá. Yeéb Jesucristodih táí jenah joí cádahcannitdh wã daác wahna caá.* ² Jwĩ íp Dios, jwĩ Maáh Jesucristobut, yeebdih oinit, í táí teo wáaca naáh, caán biícđih ñi táí jumata pínah niijná. Weembút yeebdih búdí wã táyat tútata caá.

Jwiít Cristoíhwādh Dios ã táí chājat

³ Jwiít Cristoíhwā caán biícđih jwĩ jumachah, Dios, jwĩ Maáh Jesucristo íp, jwĩh caolihdh búdí ã táí chājna caá. Páant ã táí chājachah jéihnit, caandih búdí jwĩ wēi naóhna caá. ⁴ Jwiít ãihwādh nin pah Dios át chājat wut jĩ. Nin baácđih ã chājat pínah jātih, Jesucristo biícđih jwĩ jumata pínah, yéejat wihcannit ã enechah jwĩ jumata pínahbut niijná, jwiítđih átát ñiojip taga. Pánihna, jwiít Jesúsđih jepahnitdh, “Ma yéejat jíib jumna caá”, jwiítđih ã niijcán niít. ⁵ ã náahat pahjeh jwiítđih oinit, jon jātih nin pah Dios át niijíp wut jĩ: “Wã wūáh Cristo ã chājatjĩh queét wã weh í jumbipna caá”, át niijíp wut jĩ. ⁶ Pánih oinit, jwiít ã wūáh ã oiniíhwā jwĩ jumachah, Dios jwiítđih búdí pohba át táí chāj wūhap taga. Páant ã chājatdh jenah joinít, caandih páantjeh búdí jwĩ wēi naáwát caá náahap. ⁷⁻⁸ Cristo jwĩ yéejat jíib buúdáát panihnidih jíib chājna, ãih

* **1:1** Hch 18.19-21; 19.1

meépdih yohnit, át wun wūhup wat jī.* Pánih wun wūhna, jwiít iiguípna jwī bejat déedih túi abnit, Satanás ā chéwat tōp panihnidih át watap wat jī. Pánihna, Cristo jwī yéejat jíib ā wūhatdih jéihnit, Diosboó jwī yéejatdih át yoh wūhup wat jī.* Jwiít dih búdí oi jīgah ennit, ā jéih beedáátjīh ā wūhndih páant át túi chājat túutap wat jī. ⁹⁻¹⁰ Jon jātih ā jenah joyátjidih cáacwādh ā jéihya jwuhcan yuhna, buu jwuhna Dios jwiít áihwāboodih át beh joyánap taga. Nin pah caá ā jenah joyátji: Cristo nihat ā chājatjīh, nihat japboó jumnit, nin baácboó jumnit, nump bóo tólihboó jumnitdihbat Dios ā ñioni yeó jáapdh Cristodih maáh ā waadábipna caá. Páant maáh ā jumachah, nihat áih miic ā jumbipna caá. Dios páant ā chājat pínahdh át wutap wat jī.

¹¹⁻¹² Dios ā náahat pahjeh nihatdih chājnit, jwiít judíowā Cristodih jwíh jepah waóhnhitboó jwī túi chājat pínah niijná, bitabat Diosdih ī wēi naáwát pínah niijná, jon jātih jwiít dih át ñiwip wat jī. ¹³ Yéejat jíib iiguípna ñi bejat déedih Jesús ā wun wūhatji doonádh joinít, yeebút ñitát jepahap taga. Pánih jepahnit, Jesúhwā ñi jumachah, Diosboó ā naóhniji Túini Espíritudih yeebdh át wahap taga. Pánih wahnit, áihwā ñi jumathdh ā júutna caá.* ¹⁴ Nin baácboó jwī jum jwuhachah, Túini Espiritu jwiít dih Dios ā jwíh wūhni caá. Pánihna, ā pebhboó jwī juibínachah, jwiít nihatdih túut nuúm péanit, ā bíboh páinidih ā wūh beedábipna caá, ā wūt chah yáaat pínah niijná.*

* **1:7-8** Mr 10.45; 14.24; He 9.12-14 * **1:7-8** Col 1.14 * **1:13**
Lc 24.49; Jn 14.26; 16.13-15; Hch 1.4; 2.33 * **1:14** 2Co 1.22

Pablo Jesúhwādh ã ʘʘbát

15 Páant ã chājatdih jéihnit, Jesúsdiñ ñi túi jenah joyát doonádih joinít, niñat bita Jesúhwādh ñi oyat doonádihbut joinít, 16 Diosdih ʘʘbh cádahcan, “Queétdih ma teo wáacat túina caá”, wāpĩ ni-ijná caá. 17 Nin pahbut jwĩ Maáh Jesucristoíh Diosdih wāpĩ niij ʘʘbhna caá: “Paá, meém chah wēpni jumna, queétdih ded pah ma jummatdih ma jéihyanaá, meemdíh chah ñi túi jéihyat pínah niijná”, wāpĩ niijná caá. 18 Nin pahbut wāpĩ niij ʘʘbhna caá: “Queétdih túut nuúm jwíhna, ma pebhboó ñi juibínachah, ma túut nuúm péaat pínahdih ma túi beh joyánaá. Jwiít míhwā caanná jwĩ juibínachah, chah búdí ma túi chājat pínahdihbut, ma jéihyanaá”, wāpĩ niijná caá. 19-21 Nin pahbut wāpĩ niij ʘʘbhna caá: “Ded pah búdí ma wēpat ã jummatdih queétdih ma jéihyanaá. Caán wēpatjñ Jesucristodih boonit, ma jéihyepmant bóo bawámant chúudat túutnit, maáh mat waadánap taga.* Pánihna, caanjñh chúudna, niñat maátadiñ maáh ã jumna caá. Bʘʘ láa, túttimah bóo láabut páantjeh chah maáh ã jumnipna caá. Jwiít caandíh túi jenah joinítadiñ caán wēpatjñ ma teo wáacatdih queétdih ma túi beh joyánaá”, wāpĩ niijná caá. 22-23 Páant chah wēpni ã jumuchah, Diosboó niñatdih Jesúsdiñ ãt wutat túutap taga.* Pánih chājñit, Jesúsdiñ wao dáñ panihni, áihwādh áih bácañ panihni ãt chājap taga.* Pánihna, jwiít áihwājeéh jumni niñat pebhboó ã jumuchah, áih bácañ panihni jumna, ã wēpatdih jwiítbut jwĩ bíbohna caá.

* 1:19-21 Sal 110.1 * 1:22-23 Sal 8.6 * 1:22-23 Col 1.18

2

Jíib náahcanjeh, Dios jwiít dih ã túi ùbat

¹ Yeéboó Jesús dih ñi jepahat pínah jãt ih, yeejép ñi chãj jwuhuchah, Diosboó yeebdíh wunnit panihnit pah ãt enep taga. ² Jãt ih nin pah ñit jum jwuhup taga: Dios dih yap yohnit ï túi chãjcat pah-jeh, biíc yoobó mantih yeebbút yeejép ñit chãj jwuhup taga. Pánih chãjna, nemépwã ï maáhboó ã wut at dih ñit jepah jwuhup taga. Caán nemépwã ï maáh Dios ã wut at dih yap yohni buu láa nin baácboó jumna, cãacwãdihbut Dios ã wut at dih ã yap yohat túutna caá.* ³ Jãt ih jwiít nihatbut caan páh jwí chãj jwuhup jí. Dedé jwí weñat pínah dih, jwí yéej jenah joyát dih jehbut jwí chãj jwuhup jí. Páant jwí chãjachah ennit, Diosboó jwiít dih íijnit, nihat bita yap yohnit biíc dih, ãt ih peéh chãjap ta yuh caá.* ⁴ Obohjeéhtih, páant jwí jumuchah yuhna, Diosboó jwiít dih búdí ãt oyop taga. ⁵ Pánih oi jígah ennit, boonit panihnit pah jwiít dih ãt chãjap taga. Yéej chãjnit, wunnit panihnit jum jwuhna, Jesús dih jwí jepahachah, caán biíc dih Diosboó jwiít dih ãt boonanap taga. Yeejépwã jwí jumuchah yuhna, Dios búdí oi jígah enni jumna, jwí yéejat jíib iiguípna jwí bejat déedih jwiít dih ãt túi ùbup taga.* ⁶ Cristodih booana, caán biíc dih jwiít dihbut ãt boonanap wut jí. Cristodih ã booaat túttimah, caandíh ã pebhboó chúdat túutnit, jwiít ãihwã caán biíc dih jumna, ãjeéh maáta jwí jumat pínah ni-ijná, jwiít dihbut ã pebhboó Dios ãt chúdat túutup wut jí. ⁷ Pánih chãjna, jwiít Cristoíhwã dih ã oi teo

* 2:2 Ef 6.11-12; Col 1.13 * 2:3 Col 3.6 * 2:5 Col 2.13

wáacat, débóo bádí ã jumatdih nihatdih ã júutbipna caá. ⁸ Cristodih jwĩ túi jenah joyóchah, Dios bádí oi teo wáacni jumna, jwiít dih ã túi ubna caá. Nindih ñi túi náhninaá: Ded pah jwĩ túi chãjachah yuhna, jwiít míicjeh jwĩ jéih túi ubcan caá. Obohjeéhtih, Diosboó jíib náahcanjeh jwiít dih ãt túi ubup taga. ⁹ Dedé jwĩ túi chãjat jíib nihcan, jwiít dih ãt túi ubup taga. Pánihna, “Wã túi chãjat jíib weemdih ãt túi ubup taga”, ded ã jéih niijcán caá. ¹⁰ Obohjeéhtih, jwĩ túi chãjatjí jíib túi ubcan yuhna, jwĩ túi chãjat pínah niijná, jwiít dih ãt túi ubup taga. Ded pah jwĩ túi chãjat pínahdih jãtíh ãtát jenah joiijp taga. Pánihna, Jesúíhwã jwĩ jumuchah, ded pah ã jenah joyátjí pahjeh, túi chãjat caá náahap.

Jwiít Cristoíhwã jumna, bíicdih jwĩ túi jummat

¹¹ Nindihbut ñi náhninaá: Jãtíh yeéb judíowã nihcannit, Dioíhwã ñit jum jwuhcap taga. Páant ñi jumuchah, jwiít judíowã quehli nah yapat chóodih bóodnit, Dioíhwã jumna, yeéb bóodcannitdih jwĩ íí en jwuhup jí. Obohjeéhtih, cãacwãjeh jwiít dih í bóodochah, Dioíhwã jwĩ jumatdih júutat pínah ã jumuchah yuhna, dawá wã déewã Diosdih í joyáh bojna caá. ¹² Nindihbut ñi náhninaá: Jãtíh Dios ã wahní Cristodih ñit jéih jwuhcap tají. Jwiít judíowã Dios ã ñíonitdih mácah jumna, Dios jwiít dih ã naáwátjidihbut ñit jéihcap tají. “Weemjéh tigaá ñi Maáh. Yeébboó wíih cãacwã ñi jumna caá. Pánihna, weém yeebdíh wã túi chãj wãhbirna caá”, Dios jwiít judíowãdihjeh ãt níj naáwáp tají. Yeéb judíowã nihcannitboodíh ãt níj naóhcap tají. Pánih jumna, ded pah ñi yéej chãjat peéh, yeebdíh túi

ubni pínahboodíhbat ñit jéih jwuhcap tajĩ. Diosdihbat yuúp jumnit panihnit ñit jum jwuhap tajĩ.
 13 Obohjeéhtih, buu jwuhna, Cristodih jepahna, ã yoh wāhni meépjĩh yeéb yuúp jumnit panihnitjidih, pehbbit jumnit panihnit Dios át chājap tajĩ.

14 Jesucristojeh jwiít chéne poómp jumnitjidih biíc poómp pah át chājap taga. Jwiít judíowā, yeéb judíowā nihcannitbat jātih tubit miíc eníhcannit jwĩ jumuchah yuhna, Jesús wun wāhna, jwĩ miíc íijatji jāhat panihnidih, át yoh wāhup tajĩ. Páant ã yohochah, jwiít āih bācah panihni jumna, biíc dih jwĩ túi jumna caá, buca.* 15-16 Jātih jwiít judíowā Diosjeéh túi jumat túut niijná, Moisés ã wutajjidih jwĩ túi jepah beedáhip yah jĩ. Obohjeéhtih, caandíh jwĩ jepah beedácatji jíib búdí peéh chājat jwiít dih ã jumup jĩ. Pánihna, buu Cristo jwiít dih ã wun wāhatdih túi jenah joiná, Diosjeéh jwĩ túi jumna caá.* Pánih wun wāhnit, caán peéh chājatdih át ubup wat jĩ. Jwiít chéne poómp jumnitjidih biíc poómpjeh, āih bācah panihni chājna, biíc dih Diosjeéh jwĩ túi jumat pínah niijná, át wun wāhup tajĩ.*

17 Cristo nin baácboó dei jūóhnit, ded pah Diosjeéh jwĩ túi jumat pínah doonádih át ub jūúwup tajĩ. Pánih dei jūóhni jwúub púuh laab béjna, yeéb judíowā nihcannit Diosdih yuúp jumnit panihnidih, jwiít judíowā caandíh pehbbit jumnit panihnitdihbat, caán doonádih át naáwát túutup wat jĩ.*

18 ã wun wāhatjĩh jwiít chéne poómp jumnitjidih

* 2:14 Jn 14.27 * 2:15-16 Col 2.14 * 2:15-16 Col 1.20 * 2:17 Is 57.19

jwĩ íp Dios ded pah ã jumatdih ãt jéihyanap tajĩ. Páant ã jéihyanachah, Túini Espíritu jwiít nihatdih biíc yoobó ã teo wáacatjĩh úumcanjeh Diosdih jwĩ túi jéih úúbhna caá. ¹⁹ Pánihna, yeéb judíowã nihcannit, jãtih Diosdih jéih jwuhcan, jwĩ déewã nihcan yuhna, bũũ yeebbút Jesúsdi h jepahnit, Dios ã weh ñi jumachah, jwiít nihat biíc weh pah jwĩ jumna caá. ²⁰ Jwiít nihat biíc di h Dios ã chãjni mũũ pánihni jwĩ jumna caá. Jesús ãih túini dooná di h naáwát túutnit, Dios naáwát di h naóh yapanit biíc di h Dios ã chãjni mũú wẽp teo lajat panihnidih ãt jwíih jwejep taga. Jesucristoboó choójboó wẽp teo lajni jenah enat jee dá h panihni ã jumna caá.* ²¹ Jwiít nihat Jesúsdi h jepahnidih Dios túi jenah ennit, ã dũũj pãp aabánit, caandí h weñat pínah mũũ pánihnidih ã chãjna caá. ²² Yeebdí h bũt túi jenah ennit, biíc yoobó jwĩjeéh ã dũũj pãp aabáát pah ã chãjna caá. Pánih chãjna, jwiít nihat biíc di h Túini Espíritu ã jumat mũũ pánihni jwĩ jumna caá.*

3

Judíowã nihcannit di h Pablo túini dooná di h naóhni ã jumat

¹ Páant Dios yeebdí h ã túi teo wáacachah jéihnit, weém, Pablo, yeéb judíowã nihcannit di h Diosdih búdí wã úúbhna caá. Yeebdí h Jesúsí h túini dooná di h wã bohéát jíib nemat mũúboó ĩ nemni wã jumna caá. ² Dios weemdí h oi teo wáacnit, weemdí h ãih túini dooná di h ã naáwát túutp be. Caandí h ñitát joi tágaá.* ³⁻⁶ Jon jãtih ã jenah

* **2:20** Is 28.16; Mt 21.42

* **2:22** 1Co 3.16-17; 1P 2.4-5

* **3:2**

Col 1.25

joyátji pah Dios yeéb judíowã nihcannitdih ã oi teo wáacat pínahdih cáacwã ĩ jéih jwuhcah yuhna, buu jwuhna weémboodíh Dios ã túi jéihyanap jĩ.* Caandíh yeebdíh wáát naóh daacáp jĩ. Páant wã daacátjidih ennit, “Pablodih Dios át túi jéihyanap taga”, ñi níj jéihbipna caá. Yeéb judíowã nihcannit, jwiít judíowãbat biíc yoobó Jesucristodih jwĩ jepahachah, jwiít nihat biíc dih Dios áihwã pínah ã chãjna caá. Páant ã chãjat pínahdih nihat jwĩ nuowã ĩ jéihcah yuhna, buu jwuhna Túini Espírituboó Jesús áih túini doonádih naáwát túatnitdih, Dios naáwát dih naóh yapanitdihbat át jéihyanap taga. Yeéb judíowã nihcannit, jwiít judíowã biíc dih, jwĩ yéejat jíib iiguípna jwĩ bejat déedih, Jesucristodih jwĩ jepahat jíib, Dios jwiít dih át túi ubup taga. Pánihna, jwiít nihat biíc dih áih bácah panihni jwĩ jumna caá. Páant jwĩ jumuchah, áih cáacwãdih ã naáwátji pahjeh jwiít nihat biíc dih ã túi chãjbipna caá.* ⁷ Dios weemdíh oi teo wáacnit, nin túini doonádih yeéb nihat judíowã nihcannitdih ã naáwát túatup jĩ. Pánih naáwát túatnit, Dios ã wēpatjĩh weemdíh ã jéihyanap jĩ, wã túi naáwát pínah níjnjá.

⁸ Nihat Jesúhwãdih jenah joinít, oboh jumni wã jumuchah yuhna, Diosboó weemdíh búdí ã oi teo wáacap jĩ, judíowã nihcannitdih Jesucristoíh túi doonádih wã naáwát pínah níjnjá. “Jesucristodih ñi jepahachah, Diosboó yeebdíh búdí ã túi chãjbipna caá”, wãpĩ níj naóh bohéna caá.* ⁹ Pánih túini doonádih bohéna, Dios nihatdih chãjni, ded pah ã jenah joyátji ã jéihya jwuhca naáhdih buu nihat

* 3:3-6 Gá 1.12 * 3:3-6 Col 1.26-27 * 3:8 1Co 15.9

cãacwãdih wã táí jéihyana caá. ¹⁰ ¿Pánih chãjna, ded panihat pínahji ta tigaá? Dios nihat cãacwã, bita poómpna jumna yuhna, Jesucristodih í jepahachah, biíc dih áihwã pínah ã chãjachah ennit, nihat áih ángelwã, nihat nemépwãbut Dios chah ã táí jéih beedáátdih í jéihyat pínah niijná, páant át chãjap wut jĩ. ¹¹ Dios biíhmah páant ã jenah joyátji biíc yoobó, jwĩ Maáh Jesucristo ã wan wãhatjijĩh át chãj beedánap wut jĩ. ¹² Pánihna, Jesucristodih jepahnit, áihwã jumna, úumcanjeh, “Weemdih ã táí joiná nacaá”, níj jéihnit, Diosdih jwĩ táí jéih úubhna caá. ¹³ Pánih jumnit, yeéb judíowã nihcannitdih túini doonádih wã naáwát jíib weemdih yeejép yapat doonádih joinít, ñi jĩgahca bojoó. Yeebdih jĩgahaat pínah nihcan, Diosjeéh ñi táí jummat pínah caá. Pánihna, caandih jenah joinít, ñi táí weñeé.

Jesucristo ded pah ã oyat

¹⁴ Yeéb judíowã nihcannit, jwiít judíowã biíc dih Jesucristoíhwã jumna, jwĩ íp dih bódicha caj yoh ñajnit, yeebdih búdí wã úubhna caá. ¹⁵ Dios ã pebh jumnitdih, nihat nin baácdih moondíhbut mácah poómp jwĩ jumachah yuhna, áihwãdih biíc weh pah át chãjap wut jĩ. Pánih chãjna, jwiít dih áih wãt át búudhdup wut jĩ. ¹⁶ Pánihna, nin pah yeebdih jwĩ íp Diosdih wãpĩ níj úubhna caá: “Paá, meém chah wẽpni jumna, Túini Espíritujĩh queétdih búdí ma teo wáacá, ¹⁷ queét Cristodih í táí jenah joyóchah, áih m̃ pánihni, íih caolihboó ã táí jummat pínah niijná. Pánih jumna, táí oinit, ded pah chãjna, í chãja naáh. Máa náatna baác numah bejna, b̃jcán ã táí tewat dée pah, queétbut táí oinit í jum̃ naáh,

túinijeh ĩ chājat pínah niijná”, wāpĩ niijná caá. ¹⁸ Nin pahbut wāpĩ niij ʘúbhna caá. “Paá, Cristo ã oyat ded pah búdí ã jumatdih queétdih, nihat bita míhwādihtut, ma túi beh joyánaá. ¹⁹ Jwĩ jéih beh joí beedácah yuhna, ma teo wáacá, búdí ã oyatdih ĩ jéihyat pínah niijná. Páant ĩ jéihyechah, ded pah ma túi jéih beedáátdih, ma oyatdihbut queétdih búdí ma jéihyanaá, ma náahat pah ĩ túi chājat pínah niijná”, jwĩ ípdih wāpĩ niijná caá.

²⁰⁻²¹ Ded pah Diosdih jwĩ ʘúbátdih, jwĩ jenah joyátdihbut caán chah búdí ã jéih chājna caá. Páant caán chah wēpni jumna, jwĩih caolih díftboó Túini Espíritu ã wēpatjĩh jwiitdih búdí ã jéih teo wáacna caá. Páant ã chājachah, nihat cāacwā, buu láa moón, túttimah bóo láa moonbut caandih búdí ĩ weñe naáh. Ded pah nihat áihwādihtut búdí ã teo wáacatdih ennit, ded pah Jesucristo ã túi chāj wāhatjidihtut ennit, Diosdih páantjeh weñat caá náahap. Páant tíí ã jumna nah.

4

Jwiit Cristoíhwā biícdih ded pah jwĩ jummat

¹ Yeéb judíowā nihcannitdih wā bohéat jíib nemat mʘúboó jumna, nin pah yeebdih wā wutna caá. Yeéb Dios ã ñíonit jumna, túinijeh jummat caá náahap. ² “Weém oboh jumna caá”, niij jenah joinít, bitadihtut jũihcannit ñi jumna. Bita yeebdih yeejép ĩ chājachah yuhna, queétdih íjcanjeh oinit, ded pah ĩ chājatjidihtut ñi jwʘub náhnica bojóo.* ³ Pánihtut jumna, yeéb túi biícdih Túini Espíritu ã chājatjidihtut ñi yéejacan niit. Túi biícdih jwĩ jummat pínahdih jwiit

* **4:2** Col 3.12-13

Dioíhwādh búdí bidat caá náahap. ⁴ Jwiít nihat biícđih Jesucristoíh b́acah panihnijeh jwĩ jumna caá. Jwiít nihatđih Dios ă wahní Túini Esṕritu biícđeh tigaá. Jwiít nihat Dios ă ñionit ă pebhboó jwĩ bejat pínahđih biíc yoobó jwĩ pǎina caá. ⁵ Caán biíc Jesúsđeh tigaá jwĩ Maáh. Caán Jesúsđihđeh tigaá jwiít nihat jwĩ jepahap be. Jesúsđih jwĩ jepahat júatna, biíc yoobó daabánit jwĩ jumap be. ⁶ Caán biíc Diosđeh tigaá jwiít nihatđih jáap caolih dée ăt chǎjap taga. Pánih chǎj wǎhna, jwiít nihat jwĩ íp jumna, jwĩ Maáh caá. ǃ maáh jummat nihat chah ă wěpna caá. Pánih jumna, jwiít nihatđih ă teo wáacna caá, ă weñat pínahđih jwĩ túi chǎjat pínah niijná. Jwiít nihat cǎtíh ă jumna caá. Páant ă jumachah, biíc weh dée pah túi jummat caá jwiítđih náahap.

⁷ Obohjeéhtih, biíc weh dée jwĩ jumachah yuhna, ă náahat pah mácah jéihyatnadih jwiít nihatđih Cristo ăt wǎhap taga. ⁸ Pánihat pínahđih jenah joinít Davidjiboó nin pah ăt niij daacáp tajĩ:

“Caandíh eníhcannitđih yap yohnit, Dios pebhboó ă jwǎub pǎuh laáb jǎibíát túttimah, ăihwādh túinidih ăt wǎhap taga”, ăt niij daacáp tajĩ.
(*Sal 68.18*)

⁹ Pánihna, “jwǎub pǎuh laáb jǎibíát”, ă niijíchah, “Nin baácboó jumnit, caandíh eníhcannitđih ă yap yohat túttimah, wǎnnitji í jumapboobút ăt dei bej jwǎhap wat jí”, jwĩ niij jéihna caá. ¹⁰ Pánih caanná dei bej jwǎhniiji, nihatđih maáh jummat túut niijná, Dios pebhboó ăt jwǎub pǎuh laab béjep wat jí. ¹¹ Pánih pǎuh laab béjnit, ăihwādh Túini Esṕritudih wah deyana, mácah jéihyatnadih ăt wǎhap taga.

Biqúinadih Jesúh tání doonádih naóh peetát pínah jéihyatdih át wāhup taga. Bitaboodíh Túini Espíritu ā naáwáchah joinít, naóh yapaat pínah jéihyatdih át wāhup taga. Bitaboodíh Jesúh tání doonádih jáap joinít ĩ túi jepahat pínah niijná, wēp naáwát pínah jéihyatdih át wāhup taga. Bitaboodíh Dioíhwādih duó wáinit, ā naáwát dih ĩ túi bohéat pínah jéihyatdih át wāhup taga. ¹² Pánihatdih Cristo jwiít áihwādih át túi wāhup taga, Dios ā weñat pínahdih chājnit, jwĩ túi míc teo wáacat pínah niijná. Pánih míc teo wáacna, ded pah Dios ā chājat túutuchah, jwĩ túi jéih chājna caá. Pánih jumna, jwiít nihat biíc dih Diosdih jwĩ chah túi jenah joibípna caá. Jwiít Cristoíh bácah panihni jumna, wébít ā behat dée pah, biíc dih jwĩ túi behbípna caá. ¹³ Pánihna, jwiít Dioíhwā túi behna, Jesús Dios wūúhdih chah jenah joinít, jwĩjeéh ā jummatdihbut chah jéihnit, biíc dih jwĩ túi jumbípna caá. Pánihat túttimah, túi behnit dée pah jumna, Jesucristo ā jummat pah muntih jwiítbut jwĩ jumbípna caá. ¹⁴ Pánihna, Jesucristo ā wāhni jéihyatnajíh túi míc teo wáacna, wébít dée jwĩ jumcan níit. Wébítboó dedé naáwát dih joinít, ĩpĩ túi joiná caá. Pánih joiná, bita queétdih yeenit yeejép ĩ chājat túutuchah, ĩ jepahna caá. Bita Dios naáwát dih ded pah mácah ĩ yee naáwáchah, ĩpĩ túi joiná caá. Cáac wihcanni jāáj chóo dée pah ĩ jumna caá. Íim tac yoób pahachah, johlit nolihatbut caán chóodih ā wénoh johochah, yoobópdih ā bejcan caá. ¹⁵ Jwiít dih pánihat dée jumcat caá náahap. Dios yoobópdih naóhni ā jéih yeecan caá. Páant ā jumuchah, ā naáwát dih joí cádahcan, ded yee naóhndih joyáh bojnit, bitadih oinit, yoobópdih

naáwát caá náahap. Pánih jumna, Dios ded pah jwiít dih ã chãjat tútat dih túi beh joinít, beh bejnit dée pah, yeó jáap jummat pah jwĩ Maáh Jesucristodih chah jwĩ túi jenah joibípna caá. Caán jwĩ Maáh jumna, wao dáh panihni caá. ¹⁶ Jwiítboó ãih bácah panihni caá. ãih m̄j nah, ãih téihya, ãih jítcha, ãih tãah panihni jwĩ jumna caá. Cãaquíh bácah túi d̄m̄j ñúhna, ñeh tōpna túi wēpna, ã túi jumna caá. Pánihat dée, jwiítboó túi biíc dih míc oinit jumna, jwĩ túi jumna caá. Pánih míc oina, mácah jwĩ jéihyatnajíh míc teo wáacna, beh bejnit dée pah, Dios ã weñat pínahdih biíc dih jwĩ túi jéih chãjna caá.*

Jwiít Cristoíhwã jumna, táiniboodíh jwĩ túat nuumát

¹⁷ Jwĩ Maáh ã naáwát tútatji pah yeebdíh wã wēp wutna caá. Ñi déewã Diosdih jéihcannit ã chãjat dée pah, yeéboó ñi chãj cáda haá. Queétboó túi jenah joicánnit, t̄bit yeejép ã chãjna caá. ¹⁸ Ded pah Dios ã jummatdih beh joicán, d̄p̄áat panhipboó jumnit, Diosdih yuúp pah ã jumna caá. ¹⁹ Dios ded pah queéd dih ã wutuchah yuhna, queét jéih joicánnit panihnit ã jumna caá. Pánih joicán, tíic jenah joicánjeh, ã yéj chãjatdih cádahíhcan, chah ã bidna caá.* ²⁰⁻²² Obohjeéhtih, Cristoíh táini doonádih bita yeebdíh ã túi bohénachah joiná, bita yeejép chãjnit pah jumcan, Jesús ã jummat pah yeebdíh ã jummat túatup tají. Máa yéguehdih yohat dée pah, játih ñi yeejép chãjatjidih cádahat pínah niijná, ã bohénap tají. “Jwiít yeejép chãjnit, búdí jwĩ wēibipna caá”, játih ñit níj jenah joyóp ta yuh

* **4:16** Col 2.19 * **4:19** Ro 1.21-25

jĩ. Obohjeéhtih, wēican, chah yeejép chãj bejna ñit chãjap tajĩ.* ²³ Pánih yeejép ñi jenah joyátdih cádahnit, túiniboodíh túut nuumná, Dios ã weñat pínahdihjeh jenah joyát caá náahap. ²⁴ Páant niij jenah joinít, túiniboodíh ñi chãjbipna caá. Dios ã jummat pah jwĩ jummat pínah niijná, jwiít dih jáap dée ãt chãjap taga. Páant ã chãjachah jéihnit, jwiít dih túi chãjat caá náahap.*

²⁵ Ñi yeeatdih ñi cádahaá. Jwiít biíc bácah panihnit jumna, míc yeena, jwiít mícjeh jwĩ míc yéejana caá. Pánihna, yeejanjeh, yoobópdih míc túi naáwát caá náahap.*

²⁶ Bitadih íjna yuhna, yeejép ñi chãjca bojoó. Caán yeó jáapjeh ñi íj cádahaá.* ²⁷ Ñi íjatdih quíib buudcán, nemép ã náahatboodíh ñita chãj tagaá.

²⁸ Ded nuumní ã nuumát dih ã cádaha naáh. Nuumcánjeh, ded moh yéejnidih teo wáacat túut niijná, túinidih ã tewe naáh.

²⁹ Í náah jumni naáwát dih ñi míc naóhca bojoó. Túi míc teo wáacat túut niijná, túiniboodíh jeh ñi míc naáwá. ³⁰ Jwiít Dios pebhboó jwĩ bejat pínahdih jwĩ jéihyat pínah niijná, Dios Túini Espíritu jwiít dih ãt wahap taga. Pánihna, yeejép chãjna, caandíh ñi jgahaca bojoó.

³¹ Bita yeebdíh í túi chãjcatdih jwúub náhnican, ñi quíib buudá. Páant ñi quíib buudcáh, maiwã man pah ñi íjat yeebdíh ã yéejabipna caá. Pánih íj yapnit, ñi míc jũih ñaacát dih ñi cádahaá. Bitadih yeejép dooná ñi naóhca bojoó. Dedé yeejép ñipí míc chãjatdih ñi cádahaá. ³² Pánih cádahna, yeéb

* **4:20-22** Col 3.9 * **4:24** Gn 1.26; Col 3.10 * **4:25** Zac 8.16; Ro 12.5 * **4:26** Sal 4.4; Stg 1.19-20

mícjeh oina, jġgah ennit, ñi táí míc teo wáacá. Yeebjéh ñi míc yéej chġjatjidih ñi míc ámoahoó. Diosboó jwĩ yéejatdih ā yohat pínah niijná, Cristo jwiítidih āt wun wūhup wut jī. Páant ā yohat pah, yeebbát bitadih ñi enġcatdih yohat caá náahap.*

5

Dios weh jumna, ded pah jwĩ jummat

¹ Jwĩ weh jwiítidih ennit, biíc yoobó ĩ chġjat dée pah, Dios weh ā oinit jumna, caandġh jenah joinít, biíc yoobó ñi jumwá. ² Pánih jumna, Jesucristo jwiítidih ā oyat pah, bitadihbat ñi táí oyoó. Pánih búdí oinit, jwĩ yéejat jíib, caán jwiítidih āt wun wūhup wut jī. Judíowā Dios ā weñat pínah niijná, caandġh oveja wūhhdih ĩpĩ mao cáo wūhup jī. Páant ĩ mao cáo wūhat dée pah, Jesús jwiítidih āt wun wūhup wut jī.*

³ Jesúhwā jumna, dedé íí náah jumnidih ñi chġjca bojoó. Pánih chġjatdihbat ñi jenah joicá bojoó. Bitáih bií déedihbat ñi en ñinahca bojoó. Páant ñi chġjcah, yeebdġh dooná ā wihcan niít. ⁴ Dedé íí náah jumnidih míc niijcán, jenah joicánnit pahbat míc wéhecan, ñi míc yeejép deoh naóhca bojoó. Dios táini ā jumwchah, áihwādh táinijeh míc wéheat caá náahap. Pánih míc wéhena, “Jwiítidih ma táí chġjna caá”, Diosdih niiját caá yeebdġh náahap. ⁵ Nindih ñi táí náhninaá: Ded íí náah chġjni, ded íí náah chġjat jenah joiníbat Dios pehbhoó ā waadcán niít. Ded dawá bií déedih en ñinahnitbat ā waadcán niít. Pánih en ñinahni bií déedihjeh wēinit, Diosboodġh ā jéih wēican caá. Pánih chġjni

* **4:32** Col 3.13 * **5:2** Ex 29.18; Sal 40.6

Jesucristo ã maáh nihcah, Dios maáh ã jumupboó ã jubícan niít. Pánihatdih yeéb ñi túi jenah joyoó.

⁶ “Páant ñi chãjachah, ã túina caá”, ded ã niúj yee naáwáchah yuhna, yeéboó ñi joyáh bojoó. Pánih yeejép chãjnit Dios ã wutatdih í yap yohatji jíib, búdí íjnit, queétdih ã peéh chãjbipna caá. ⁷ Pánih yeejép chãjnitdih ñi pej jumca bojoó. ⁸ Diosdih ñi jepahat pínah jãtìh, túi chãjcan, dupúat panhipboó ñit jum jwahup taga. Obohjeéhtih buu, Jesucristodih jepahna, baabát panhipboó ñi jibna caá, buca. Pánih jumnit, túinijeh ñi chãjaá. ⁹ Baabát panhipboó jumna, túinijeh ñi jumbipna caá. Yecanjuh, yoobópdi ñi naóhbipna caá. ¹⁰ Dios ded pah ã weñat pínahdih ñi bidí. ¹¹ Diosdih náahcannit dupúat panhipboó jumna, yeejép í chãjat pah yeéboó ñi chãjca bojoó. Páant í túi chãjcatdih ennit, Dios naáwát dih naóhna, “Páant ñi chãjachah, ã túican caá”, queétdih ñi niijí. ¹² Cãacwã í encah, queét yeejépwã tubit yeejép í chãjatdih bitadih míic wéhena, jwíta tíic tagaá. ¹³ Queét yeejép chãjnitdih Dios naáwát dih naóhna, jiiátjìh jii bídat pah chãjna, í chãjat yeejép ã jummatdih queétdih jwí jéihyana caá. Páant í yéj chãjatdih jwí jéihyanachah, í túut nuumbípna caá. Pánih túut nuumnít, baabát panhipboó í jumbipna caá. ¹⁴ Pánihat pínah caá nin pah jwĩpĩ niúj ewep:

“Eoni panihni, ma jáa bojoó. Wunni panihnibut, ma boo pud jãwá. Meém yeejép chãjni baabát panhipboó ma jummat pínah niijná, ma túi chãjat pínahdih Jesucristo meemdíh ã jéihyabipna caá”, jwí niijná caá.

¹⁵ Pánihna, ¡ñi túi chãja chaáh! Jenah joicánnit

pah jumcanjeh, túi jenah joinít ñi jumúú. ¹⁶ Búú láa cãacwã tabit yeejép ï chãjachah, yeéboó yeó jáap jumat pah Dios ã weñat pínahdih jenah joinít, túinijeh ñi chãjaá.* ¹⁷ Pánih jenah joicánnit jumcan, Dios ã weñat pínahdih ñi túi beh joyoó. ¹⁸ Ñi weñat pínahdih bidna, babh máihca bojoó. Máihnit, ñi jenah joyátdih, ñíih bácahdihbut ñi yéejana caá. Yeejépdihbut ñi chãjna caá. Máihñat yeebdíh yeejép wutni dée caá. Obohjeéhtih, Túini Espiritu ã túi teo wáacat pínahdih búdí ñi bidíí. Caán ã wãhni weñat pínahdihjeh ñi bidichah, caánboó yoobópdih weñat ã wãhbipna caá. Caán túiniboodíhjih wutni caá. ¹⁹ Míc wéhenit, Diosdih ñi weñeé. Pánih wëina, David ã daacátjidih, bita ï daacátjidihbut eonit, Túini Espiritu ded pah ã jéihyanachah, caandíhbut ñi eweé. Caolih díftboobút caandíh wëinit, ñi eweé. ²⁰ Pánih jumnit, yeéb Cristoíhwã ded pah ã yapachah, biíc yoobó “Ma túi chãjna caá, Paá”, Diosdih niijnít ñi jumúú.*

Jesúíhwã áa jumnit ded pah ï jumat

²¹ Cristojeéh túi jumat túut niijná, bita Jesúíhwã ï jenah joyátdih ï naáwáchah, wëi joinít ñi míc túi jepahaá.

²² Jwí Maáh Jesúsdiñ ñi jepahat dée pah, yeéb yaádhboó ñi weha mánadiñ ñi túi jepahaá.* ²³ Nin pah ã jumna caá: Newé wao dáh panihni ã jumuchah, ájeéh bóli áih bácah panihni mi jumna caá. Pánihna, mi áaboó mi maáh panihni caá. Pánihat pah, Cristo maáh jumna, wao dáh panihni ã jumuchah, jwiít áihwãboó áih bácah panihni jwí

* **5:16** Col 4.5 * **5:20** Col 3.16-17 * **5:22** Col 3.18; 1P 3.1

jumna caá. Caanjéh jwiít dih tui ubni ã jumna caá.
²⁴ Pánihna, Cristo íhwã jumna, caandíh jwí tui jepahat pah yadboó mijeéh bóodih jepahat caá náahap.

²⁵ Buh yeéb neoná áa jumnit dih jwuh wã jwúb naóhna caá. Cristo jwiít áihwãdih búdí oina, jwiít dih át wun wuhup wut jĩ. Pánihna, jwiít dih ã oyat pah, yeebát ñi weha mána yaáhdih ñi tui oyoó.* ²⁶ Jwiít áihwã jwí jumat pínah niijná, Cristo jwiít dih wun wuhudih át dei jwúwup tajĩ. Pánihna, áih túini doonádih joinít, jwí jepahachah, yéguehdih jwí choc yohat pah, jwí yéejat dih át yoh wuhup taga. Áihwã jwí jumat jútat pínah niijná, jwí daabánap jĩ. ²⁷ Pánih yéejat dih yoh wuhna, jwiít nihat áihwãdih Dios pehbóo Jesús ã ub bejehah, túini yoobát yéejat wihcannit, quei wihcannit, wiguihat wihcannit, tui jíghnit jwí jumbipna caá.* ²⁸ Cristo áihwã áih bácah déedih ápĩ tui en daoná caá. Pánihat pah, yeéb neoná ñíh bácahdih ñipĩ míc tui en dawát pah, ñi weha mána yaáhdih tui en dawát caá náahap. Queétoó ñíh bácah dée jumna, queédih tui en daonít, ñíh bácahdihbut tui en daoná caá ñi chãjap. ²⁹⁻³⁰ Jwiít nihat jwíh bácahdih yéejáihcan, caandíh jwípĩ tui chãjna caá. Pánihat pah, jwiít Cristo íhwã áih bácah dée jwí jumachah, caanbát jwiít dih ápĩ tui chãjna caá. Páant ã tui chãjat pah, jwí weha mána yaáhdih tui chãjat caá jwiít dihbut náahap. ³¹ Nin pah Moisés át niij daacáp tajĩ: “Páant tigaá ded newé yad pínahdih ubna, ã manádih pahnit, ájeéh bólijeéhjeh ã jumbipna caá. Pánihna, queét chénewã jumna

* **5:25** Col 3.19; 1P 3.7 * **5:27** 2Co 11.2; Ap 21.2,9

yuhna, biíc bácah dée pah ï jumbipna caá”, ãt niíj daacáp tajĩ.*

³² Páant ã niiját dih beh joyát ã buona caá. Obohjeéhtih, buona yuhna, yoobópdih ã jumna caá. Nin pah niíj naóhna caá ãt chãjap: Jwiít nihat Cristoíhwã ãih bácah panihni jumnit, ãjeéh biíc pah jwĩ jumna caá. ³³ Pánihat dée, yeéb neoná ñi weha mána yaádhjeéh biíc pah ñi jumna caá. Pánih jumnit, ñi weha mána yaádh dih túi oyat caá náahap. Yaádhbut ñi weha mánadih túi joyát caá náahap.

6

Ï mána ï wehjĩh ded pah ï jummat

¹ Bũũ yeéb wébitdih jwũh wã jwúũb naóhna caá. Jwĩ Maáh Jesúsdih jepahnit jumna, ñi mána ï wutachah, jíponih niijcánjeh, ñi jepahaá. Páant chãjatdih yeebdih Dios ã náah yacna caá.* ²⁻³ Jon jãtĩh Moisés nin pah ãt niíj daacáp tajĩ: “Ñi mánadih ñi túi chãjaá. Pánih chãjna, búdí wẽinit, nin baácboó maatápdih ñi túi jumbipna caá”, ãt niíj daacáp tajĩ.* Páant niíj wutna, jwíih láa nin pahbut ãt niijíp wut jĩ: “Páant ñi chãjachah, wã niijátji pah yeebdih wã túi chãjbipna caá”, ãt niijíp wut jĩ.

⁴ Bũũ yeéb ï mánadih jwũh wã jwúũb naóhna caá. Ñi wehdih tũbit jũihnit, ñi íjjaca bojoó. Obohjeéhtih, oinit, ñi túi wái behanaá. Dios ã weñat pínahdih ded pah ï chãjat pínahdih ñi bohénaá. Dios naáwát dih ï joyáh bojochah, ñi túi joyát túutú.*

Teo wãhñit, ï maátabut ded pah ï jummat

* **5:31** Gn 2.24 * **6:1** Col 3.20 * **6:2-3** Ex 20.12; Dt 5.16 * **6:4** Col 3.21

⁵ BꞄꞄ yeéb teo wāhñitdih jwꞄh wā jwꞄꞄb naóhna caá. Yeebdíh wꞄtñit ï peéh chājat pínahdih úmna, queétdih ñi túi jepahaá. Cristodih ñi jepahat pah, queétdihbut wēinit ñi jepahaá. Yabhcan-jeh, queétdih ñi túi teo wūhꞄ. ⁶ Yeebdíh wꞄtñit ï enechahjeh túi teona yꞄhna, ï encah teocan-nit ñi jamca bojoó. Obohjeéhtih, Cristodih teo wāhñit jamna, Dios yeebdíh ã náah yacat pah túi wēi chājñit ñi jamꞄ. ⁷ Pánihna, ded pah teo wāhna, cāacdiñjeh teo wāhcan, wēinit, jwꞄ Maáhboodíhñjeh ñi teo wūhꞄ. ⁸ Pánih chājñit, nindih ñi túi náhninaá: Ded pah túini ñi chājachah, Diosbut túinidih yeebdíh ã chāj jwꞄꞄbabipna caá. Ñi teo wāhꞄchah, cāacwā yeebdíh jíib wāhna, ï wāhcahbut, biíc yoobó Dios túinidih ã chāj jwꞄꞄbabipna caá.*

⁹ BꞄꞄ yeéb queét ï maátadih jwꞄh wā jwꞄꞄb naóhna caá. Yeebdíh teo wāhñitdih túinijeh ñi chājaá. “Wā wꞄtatdih ma jepahcah, búdí wā peéh chājñipna caá”, ñi niúj jāihca bojoó. Nindih ñi túi náhninaá: JwꞄ Maáh Jesucristo, Dios pebhboó jamni queétdihbut ï Maáh caá.* Pánihna, yeéb maáta ded pah ñi chājatdih jéihñit, yeebdíh teo wāhñit ï chājatdihbut jéihñit, biíc yoobó ñi chājat jíib ã túi wāhñipna caá.*

Jwiít Cristoíhwā ded pah nemépwādh jwꞄ jéih yap yohat

¹⁰ BꞄꞄ yeebdíh péeni wꞄtatdih wā naáwíhna caá. JwꞄ Maáh Jesús niñatdih jéih beedáni ã jamꞄchah, jwiít caán biícñih jamna, caandíh túi

* 6:8 Col 3.22-25 * 6:9 Col 4.1 * 6:9 Dt 10.17; Col 3.25

jenah joinít, nemépwādh yap yohnit jummat caá náahap. ¹¹ Romadh moón soldadowā ĩ maáh nihat ā wāhni míc maona ĩ jāhat chóodih ĩpĩ ðuoná caá. Pánihat dée pah yeebbút jwĩ Maáh Dios nihat ā wāhni jāhat pínahdih ñi ubuú, nemép ā yeeatdih túi yap yohat túut niijná. ¹² Cāacwādhjeh pohba nihcan caá jwiít dih míc mawat panihni ā jumap. Obohjeéhtih, wēpép nemépwādh jwĩ míc maona caá. Queét nihat jwiít cāacwādh yeejép ĩ wutna caá. Jwiít Jesúhwādh chah eníhcan, Dios ā wutadit ĩ yap yohat túutna caá. ¹³ Pánihna, ĩtah chío panihni, nihat Dios ā wāhni jāhat pínahdih ñi ubuú, nemép yeebdíh yeejép ā chājat túutachah yuhna, ñi túi yap yohat túut niijná. Pánih chājna, míc mao péanachah, ñáo jweicánjeh, wēp ñuhnit panihnit ñi jumbipna caá.

¹⁴ Túi yap yohnit pínah jumíhna, nin panihnit ñi jumú: Soldado āih juyáát tōpjh āpĩ juí wái chéona caá, āih yégueh chóodih ā túi tewat pínah niijná. Pánihat dée, yeebbút yoobópdih naóhnit ñi jumú. Soldado āih tacadihbut ĩtah chío āpĩ ðuoná caá, caandíh eníhcannit āih caolihdih ĩ ñuhp chūúacat pínah niijná. Pánihat dée, yeebbút Dios ā wēpatjh túi yoobópdih chājat caá náahap, nemépboó ñih caolihdih ā jéih yéejacat pínah niijná.* ¹⁵ Soldado āih jítchadh túi wēpép zapatosdih āpĩ ðuoná caá, ā túi bejat túut niijná. Pánihat dée, yeebbút Dioíh túini doonádih ñi túi joí cádahca bojoó, jwĩ maáhjeéh túi jumnit, bitadh naawádh ñi túi bejat túut niijná.* ¹⁶ Soldado āih bácahdih jāhat naadh āpĩ ubna caá, caandíh eníhcannit ĩh

* **6:14** Is 11.5; 59.17 * **6:15** Is 52.7

ñũpat doóbnadiah cáo dodhñit, ï ñũpat chah enñit, caán naajñh ã túi míc jãhat túut niijná. Pãnihat dée, yeebbút Diosdih túi jenah joí cádahca bojoó, nemépboó chah yeejép ã yee wutuchah yãhna, ñi joyáh bojat túut niijná.* ¹⁷ Soldado ïtah waochá páhadiah ãpĩ páahna caá, ãih wao dáhdih ã túi wapát pínah niijná. Pãnihat dée, Dios yeebdíh ã túi ubatjidih ñi túi náhninaá, nemép ñi jenah joyátdih ã yéejacat pínah niijná.* Soldado íbat naadíh ãpĩ ubna caá, caandíh eníhcannitdih ã túi míc mawat túut niijná. Pãnihat dée, Túini Espíritu ã teo wáacatjñh ded yeebdíh yéejaiñnidih Dios naáwátdih ñi naáwá,* caandíh ñi túi yap yohat túut niijná.* ¹⁸ Pãnih jãmñit, ded pah ã yapachah, Túini Espíritu ã teo wáacatjñh Diosdih ñi túi úbh cádahca bojoó. Pãnih úbhna, ñíh pínahdih úbhñit, bitaíh pínahdihbut ñi úbú. Ñonit panihñit jãmcanjeh, jáanit panihñit túi jenah joinít ñi jãmú. Nihat Jesúihwãdihbut ñi úbh cádahca bojoó. ¹⁹ Pãnih úbhñit, weemdíhbut búdí ñi úbú, úmcanjeh Jesúih túini doonádh yooópdih wã túi naáwát pínah niijná. ²⁰ Caán doonádh wã naáwát jíib nemat múbóó ïtah tōpjñh chéoni wã jãmna caá. Pãnihna, caán túini doonádh naóhñit, úmcanjeh wã túi wēp naáwát pínah niijná, weemdíh ñi úbú. Weemdíh páant naáwát caá náahap.*

Pablo ã pée túyat tútat

²¹ Ded pah wã jumatdih ñi jéihyat pínah niijná, yeeb pébhna Tíquicodih wã wahna caá.* Caánboó

* **6:16** Sal 7.13 * **6:17** Is 59.17 * **6:17** He 4.12 * **6:17** Ro 13.12-14; 1Ts 5.8
 * **6:20** Col 4.2-4 * **6:21** Hch 20.4; 2Ti 4.12

Jesúsdih túi jéihni, jwĩ oini caá. Jesúh túini doonádih wã naóh jibichah, weemdih búdí ãpĩ teo wáacna beé. Pánihna, ñi pebhna jubínit, nihatdih yeebdih ã naóhbiipna caá. ²² Páant ã naáwáchah, wã túi jumardih jéihnit, ñi jĩgahat ã yayát pínah niijná, ñi pebhna caandih wã wahna caá.

²³ Jwĩ íip Dios, jwĩ Maáh Jesucristo biícđih yeéb Jesúhwã ñi túi jumúú. Pánih jumna, Jesucristodih túi jenah joí cádahcan, chah míic oinit ñi jumúú. Páant ñi jumard pínahdih Dios ã teo wáaca naáh. ²⁴ Yeéb nihat jwĩ Maáh Jesucristodih oi cádahcannitdih Dios ã oyatjĩh ã túi chãja naáh. Yeebdih búdí wã túyat túatna caá.

Páant bóojeh tigaá.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
34c9543b-57a6-5290-ab7b-4fa15529a7e2